

明張文忠公全集



明張文忠公全集一

奏疏三

進帝鑑圖說疏

臣等聞商之賢臣伊尹告其君曰德惟治否德亂與治同道罔不興與亂同事罔不亡唐太宗曰以銅爲鑑可正衣冠以古爲鑑可見興替臣等嘗因是考前史所載治亂興亡之迹如出一轍大抵皆以敬天法祖聽言納諫節用愛人親賢臣遠小人憂勤惕厲卽治不畏天地不法祖宗拒諫遂非侈用虐民親小人遠賢臣般樂怠傲卽亂出于治則雖不階尺土一民之力而其興也勃焉出于亂則雖藉祖宗累世之資當國家熙隆之運而其亡也忽焉譬之佩蘭者之必馨飲醜者

之必殺以是知人主欲長治而無亂其道無他但取古人已
然之迹而反已內觀則得失之效昭然可覩矣仰惟皇上天
縱英資光膺鴻寶孜孜誦習懋殷宗典學之勤事事講求邁
周成訪落之軌海內臣民莫不翹首跂足想望太平臣等備
員輔導學術空疏夙夜兢兢思所以佐下風效啟沃者其道
無繇竊以人求多聞事必師古顧史家者流亡慮千百雖儒
生皓首尙不能窮豈人主一日萬幾所能徧覽乃屬講官臣
馬自強等略倣伊尹之言考究歷代之事除唐虞以上皇風
元邈紀載未詳者不敢采錄謹自堯舜以來有天下之君撮
其善可爲法者八十一事惡可爲戒者三十六事善爲陽爲

吉故用九九從陽數也惡爲陰爲凶故用六六從陰數也每
一事前各繪爲一圖後錄傳記本文而爲之直解附於其後
分爲二冊以辨淑慝仍取唐太宗以古爲鑑之意僭名歷代
帝鑑圖說上呈睿覽昔班伯指畫屏以諫意專戒懲張九齡
千秋金鑑一書詞涉隱諷今臣等所輯則媿惡並陳勸懲斯
顯譬之薰蕕異器而臭味頓殊冰鏡澄空而妍媸自別且欲
觸目生感故假像於丹青但取明白易知故不嫌於俚俗雖
條目僅止百餘而上下數千載理亂之原庶幾略備矣伏望
皇上俯鑒愚忠特垂省覽視其善者取以爲師從之如不及
視其惡者用以爲戒畏之如探湯每興一念行一事卽稽古

以驗今因人而自考高山可仰毋忘終簣之功覆轍在前永作後車之戒則自然念念皆純事事合理德可媲美於堯舜治將埒於唐虞而千萬世之下又必有願治之主效忠之臣取皇上今日致治之迹而繪之丹青守爲模範者矣隆慶六年十二月十八日奉聖旨覽卿等奏具見忠愛懇至朕方法古圖治深用嘉納圖冊畱覽還宣付史館以昭我君臣交修之義禮部知道

帝鑑圖說述語

附

右善可爲法者八十一事臣等旣論次終篇乃作而歎曰嗟乎孟軻稱五百年必有王者興傳曰千年一聖猶旦暮也詎

不信哉夫自堯舜以至於今代更幾世主更幾姓矣而其可
取者三十餘君而已中間又或單舉一善節取一行究其終
始尙多可議其完善燦懿卓然可爲世表者纔什一耳可不
謂難哉天祐我明聖神繼作臣等嘗伏讀我祖宗列聖實錄
仰稽創守鴻規則前史所稱聖哲之事無一不備者略舉其
概如二祖之開基靖難身致太平則堯舜湯武功德並焉典
則貽休謨烈垂後則漢綱唐目巨細具焉昭皇帝之洪慈肆
宥培植國脈則解網澤骨之仁也章皇帝之稽古右文勵精
圖治則宏文延英之軌也睿皇帝之聘禮處士訪問治道則
蒲輪元纁之舉也純皇帝之親愛諸王厚遇邸邸則惇睦友

于之風也敬皇帝之延見羣臣曲納讜言則揭器止輦之明也肅皇帝之心存敬一治本農桑則丹書無逸之箴也皇考穆宗莊皇帝之躬修元默服戎懷遠則垂衣舞干之化也其他片言之善一事之美又不可以殫述蓋明興纔二百餘年而聖賢之君已不啻六七作矣以是方內乂安四夷賓服重熙襲洽迭耀彌光致治之美振古罕儷焉猗歟休哉豈非乾坤光岳之氣獨鍾于昭代河清里社之兆並應于今日哉詩曰下武維周世有哲王王配于京世德作求我明蓋軼有周而特盛矣今皇上睿哲挺生膺期撫運又將覲光揚烈以遠追二帝三王之治焉臣等何幸躬逢其盛

右惡可爲戒者三十六事自古人君覆亡之轍大略不出乎此矣諺曰前人蹟後人戒然世主皆相尋而不改彼下愚不移固無足論至如晉武唐元莊宗之流皆英明雄武又親見前代敗亡之禍或間關險阻百戰以取天下及其志得意盈迷心酖毒遂至一敗塗地不可收拾其視中才守成之主反不逮焉書曰惟聖罔念作狂成敗得失之機可畏也哉臣等嘗伏讀我太祖高皇帝實錄與侍臣論及古來女寵宦寺外戚權臣藩鎮夷狄之禍侍臣曰叔季之君至于失天下者嘗在于此高皇帝曰朕究觀往古深爲用戒然制之有道若不惑於聲色嚴宮闈之禁貴賤有體恩不掩義則女寵之禍何

自而生厚其恩賚不任以事苟干政典裁以至公則外戚之禍何由而作宦寺便習供給使令不假以兵柄則無宦寺之禍不設丞相六卿分職使上下相維大小相制防耳目之壅蔽謹威福之下移則無權臣之禍藩鎮之設本以衛民使財歸有司兵必合符而調豈有跋扈之憂修武備謹邊防來則禦之去不窮追則無夷狄之虞淵哉睿謨誠萬世聖子神孫所當遵守而弗失者也至于端本澄源正心修身以銷釁孽于未萌杜間隙於無迹者則又備載寶訓及御製諸書伏惟聖明畱意焉臣等不勝幸甚

謝銀幣疏

昨該臣等以所輯帝鑑圖冊進呈睿覽面蒙天語嘉納隨又
節奉聖諭卿等進帝鑑圖冊於君道甚有裨益賜元輔居正
銀五十兩紵絲四表裏以示朕嘉獎忠悃之意欽此伏念臣
猥以迂疏謬蒙知遇雖無伊尹致其君必爲堯舜之學實有
魏徵勸其主力行仁義之心故每因事以納忠蓋以責難而
爲敬顧葵藿徒塵於傾嚮而涓埃何補於崇深豈意聖明特
垂鑒獎恩綸溫綍已踰華袞之褒彩幣精鏐更拜尙方之錫
寵榮薦被感愧交并履厚戴高知報酬之無地鞠躬盡瘁惟
捐殞以爲期

明制體以重王言疏

竊照閣臣之職專一視草代言故其官謂之知制誥若制詞失體以致輕褻王言則閣臣爲不職矣謹按舊規凡官員應給誥勅該部題奉欽依手本到閣撰述官先具稿送臣等看詳改定謄寫進呈候批紅發下撰述官用關防掛號然後發中書舍人寫軸用寶此定制也至於制命之詞貴在簡嚴莊重乃爲得體查得成化宏治年間誥勅敘本身履歷功績不過百餘字祖父母父母及妻室不過六七十字至於慶典覃恩則其詞尤簡蓋以恩例概及比之考績不同故以賚被爲榮不必詳其閱歷此制體也近年以來俗尙干求詞多浮靡撰述官沿襲宿弊往往不候進呈先將文稿傳示於人其中

詞語又過爲誇侈多至數百千言或本無實行虛爲頌美或
事涉幽隱極力宣揚臣等方欲爲之更定而本官已先得稿
登軸矣夫誥勅者朝廷所以告諭臣下者也臣諛其君猶謂
之佞況以上諛下是何理乎查得嘉靖十二年該大學士張
孚敬等題爲重誥勅事奉世宗肅皇帝聖旨卿等所言足見
敬慎至意近年以來委的誥詞之文浮泛誇譽至於數百甚
非制體甚非王言今後都著刪去浮詞以存實體欽此又該
本官題爲前事參論制勅房辦事大理寺評事岳梁撰擬南
京兵部尙書陶琰贈官誥文浮詞誇誕又不先送內閣看詳
輒便進呈等因奉世宗肅皇帝聖旨卿等另撰誥文來看岳

梁騁賣浮詞蔑視制辭不遵前旨著法司提了問欽此比時嘉靖初年誥勅之文視成化宏治雖爲稍繁然尙未如近年之甚也竊以禮貴從先辭尙體要況命令之辭乃一代典制傳之四方垂之後世所關非小此係臣等職掌不容不爲釐正伏乞皇上念朝廷體統之當尊國家典制之當守勅下臣等戒諭各撰述官自今以後凡爲制誥必須復古崇實毋得徇情節辭以壞制體及文字未經進呈亦毋得預行傳示以市私交如此庶王言重國體尊而臣等亦得以守其常職矣奉聖旨卿等說的是今後誥勅文字都著刪去浮詞務崇本實各官撰完送閣卿等還要仔細看詳改定乃可進覽如有

仍前徇情節辭及不候進呈預行傳示的照例參來處治該部知道

請開經筵疏

去年八月內該臣等題爲乞崇聖學以隆聖治事奉聖旨覽卿等奏具見忠愛八月內擇吉先御日講經筵候明春舉行禮部知道欽此今年正月初五日奉聖諭初七日開日講諭卿等知之欽此臣等恭照經筵日講皆所以仰成聖德講明治道在我祖宗列聖自有成規去年臣等因山陵未畢歲事將終故請皇上先御日講次開經筵荷蒙聖明卽賜允行後值隆冬講讀不輟茲於年節假內卽已諭開日講臣等仰見

我皇上惕勵之誠法天行健緝熙之學與日俱新誠宗社萬
萬年無疆之慶也但經筵盛典亦宜次第舉行且在廷臣工
久切快覩^况之望伏乞勅下禮部遵照前旨於二月內擇日具
儀肇舉令典其合用知經筵同知經筵及侍班講讀執事侍
儀等官容臣等查照舊規議擬上請仰候聖裁施行庶勸講
之禮既不廢於公庭造膝之言又日陳於左右聖功已密而
益密聖德日新而又新矣萬厯元年正月初十日奉聖旨是
禮部知道

廣東奏捷辭免加恩疏

今日早該臣等恭侍皇上講讀畢伏蒙面諭以兵部覆廣東

奏捷本謬及臣等運籌効勞欲加陞廕臣等自愧無功當卽面奏辭免又蒙皇上再三獎諭以先朝舊典必欲另行擬票臣等仰見天恩隆重未敢面違謹承旨叩頭而出隨具揭瀝誠控辭未蒙俞允茲又蒙聖諭嶺東積寇蕩平皆卿等贊謀廟堂致無遺策功當首論擬勅來行欽此臣等祇奉綸音愈切惶懼竊惟論功行賞者朝廷之大典視草演綸者儒臣之常職比者嶺寇蕩平實仰仗我皇上天威遠播及督臣將士協心奮力所致臣等官居禁近職在代言旣無親冒矢石之勞又非典司戎旅之任雖曾參帷幄之末議借前箸以効畫皆仰遵廟謨幸而微中豈敢貪冒天功覬叨懋賞且人臣有

難報之恩無必酬之勞臣等備員輔弼仰戴高厚卽捐糜此身猶不足以報答其萬一況今陰陽失調旱沴爲虐閭閻寂寞盜賊公行皆臣等奉職無狀所致方惶恐俟罪之不暇又何敢傲偶逢之幸以掩不職之尤冒非分之恩以重忝竊之咎哉明主馭下施一概之平亦不宜獨私親近橫予濫及以失遠方將士之心乖朝廷激勸之義也臣等反覆思惟心悚背汗所有加恩勅諭萬不敢擬伏望皇上俯鑒愚誠特停前命俾臣等獲安微分免於罪愆則聖明體諒之恩雖九遷之榮十世之賞不足以喻其隆赫矣奉聖旨卿功在社稷乃勞謙不有足立臣極朕心甚嘉特賜卿銀一百兩紵絲六表裏